



UKA16/121
02. oktober 2016
Debora Kleist

**Uunga siunnersuut: Atuarfik pillugu Inatisartut inatsisaata allanngortinneqarnera
Inatsisartut inatsisaat nr.xx, yy 2016-imeersoq
(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)**

Naalakkersuisut inatsisissap allannguutissaatut siunnersuuminni angajoqqaat atuartuutillit ullumikkumut namminneq ataatsimoorfeqannginnerat tikkuartugaasa ilagaat. Siunnersuumi uani aaqqiivigineqarnissaanut anguniagaavoq, meeqqat atuarfianni angajoqqaajusut nuna tamakkerlugu siunnersuisoqatigiivinnik pilersitsinikkut.

Inuit Ataqatigiit isumataavugut meeqqat atuarnerannik atugarissaarnissaanut aammalu meeqqat atuarfiat nukittoq pilersinneqarnissaanut iliuuseqartuarnissaq pingaartuusoq. Meeqqat Atuarfiat pillugu siusinnerusukkut oqallissaarutitsinni oqariartuutigereerparput perorsanikkut suliatigullu atuarfiit pitsaasusaat annertunerusumik eqqumaariffigineqarnerusariaqartut.

Naalakkersuisut angajoqqaat siunnersuisoqatigiivinnik pilersitsinissamik siunnersuuteqanerat siusinnerusukkut apeqquserparput makku tunngavigalugit. Siunnersuisoqatigiivinnik angajoqqaanit qineqqusaarfiusussamik avitsisoqassappat inuuttaasunut kingunissai pillugit aammattaq qanorpiaq akeqassanersoq kikkullu akiliissanerannut tunngassuteqarput. Apeqqusersimasagut Naalakkersuisut naqqiuteqarnerminni ersersippaat qinigaaffik siulleg piffissami 1.juli 2017-imiit 30.juni 2021-mut pissasoq. Aningaasartuutissallu eqqarsaatigalugit aningaasanut inatsimmi ukiumoortumik aalajangerneqartarnissa siunnerfiuvoq.

Inuiaqatigiittut meeqqat atuarfiannik akisussaqaataanerput annertusartuartaariaqarparput. Meeqqat atuarfiat ataatsimoorluta nukittorsaaniarutta, angajoqqaat atuartuutillit meeqqamik atuarnerannut akuunerunissaat peqataanerunissaallu pisariaqarpoq. Tamannalu angajoqqaajusut namminneq piumassusertik tunngavigalugu suleqataanermikkut annertunerusumik oqartussaaffiginerusinnaavaat.

Isumaqarpugut angajoqqaatut, oqartussaasuseqarlutillu perorsaasut akisussaaqataanermik oqartussaaqataanermillu misigissappata qanimut suleqatiginissaat pingaartuusoq. Nuna tamakkerlugu angajoqqaat siunnersuisoqatigiivinnik pilersitsinermi, ullumikkut atuarfinni siulersuisuusut pioreersut inissisimani innarlerneqannginnissaasa eqqumaariffineqarnissaa pingaartipparput. Atuarfinni siulersuisuusut qanimut ataqatigiissumik suleqatigilluarneqarnissaat inerssuusutigaarput. Piffini tamani angajoqqaat, perorsaasutut akisussaaffillit minnerunngitsumillu atuarfinni siulersuisuusut akisussaasusaat oqartussaaqataanerallu annikilleqannginnissaa qulakkeertariaqarpoq.

Taamma oqaaserqarluta ataatsimiitsitaliami sukumiissumik suliarineqarnissaa inassutigaarput.